



Fasnacht 2016

150 Joor ganz Oobe

Lang isch es häär, do isch es s erscht mool glunge,
me het das Matterhorn bezwunge.
Zem erschte Mool isch s bestiige worde,
vom Wimpert und sinere ganze Horde.

Aabe koo sinn zwoor nimmi seer vyyl,
aber doobe sinn Alli gsi, an iirem Zyyli.
Bim Abstieg sinn e baar Saili grisse,
das het denn grad e paar Lääbe gschlisse.

Ainewääg isch es fir sämtligi Staate
e genaals Fotiobjäggt, vor allem fir d Asiate.
Uffstieg und Foti, egal was fir Wätter,
für d Touris doesn't dät rilli mätter!

Und scho bald gsesch das Hernli iiberal,
uff jedem Produggt, s isch katastrofal.
Kai Kaffiraam ooni e Matterhornbildli,
kai Schoggi ooni s Schwyzer Uushängeschildli.

Zu jeedere volle Stund kunnt e Raisebuss,
und spuggt denn tonnewiis Touris uss.
Und am Matterhorn sälber, mit Piggel und Sail,
glättere massewyys Bäargstiiger und finde s gail.

Au mir Junteressli wuurde gäärn "s Hoorn" erklimme,
doch mien mir zerscht unseri Usduur drimme.

Und unser Training duet ys garantiere,
dass mir s sicher ohni Doping probiere.

Aber s wäär digg, uff 4'478 Meter der Arabi z spiile,
ooni derbyy uff d Noote z schiile.

S Piccolo als Piggel wäär no stabiil,
nur s Gwicht vo der Drummle grad e bitz vyyl.

Und wenn mir deert oobe denn musiziere,
darfsch uff kai Fall dini Schleegel verliere,
denn vo deert Oobe, e so isch es halt,
falle die grad diräggt in e Spalt.

Und uff dääre Heechi, s isch nit so glatt,
kemme d Deen au nimm so satt.
So duet uff em Gipfel, gheersch alli steene,
der Gässler nimm wie im Käller deene.

Fir eimool e Faasnacht ganz wyt Oobe,
s Fasnachtscomité wurd uns loobe,
s wurd alles diräggt via TeleBasel iiberdrait,
sofäärn d Stimm vom Reporter nit versait.

Kai Gedrugge, niene Stau,
vo de Guggemuusigge kai Radau,
d Dambuure wuurde immer d Pfyffer gheere,
niemerts wurd unser Zämmespiil steere.

So ganz wyt wägg vo der haimische Stadt am Ryy,
wer waiss ob mir deert wirgglig wuurde gligglic syy?
Wuurd uns nit die haimelig Stimmig fääle,
wenn mir uns mit em Glopfgaischt der Gämsbäärg uff quäle?

Au d Ladäärnedrääger wääre froo,
mir wurde so dummi Idee loo.
Will d Ladäärne deert uffe draage, s macht si muff,
isch no vyyl schlimmer als der Spaalebäärg uff.
Drum hänn mir uns zämme gno und bliibe verninftig
und so Experimänt lemmer au kinftig.
liberlööön das Matterhorn de Bäärgstiiger und Asiate
und kimmere uns um Schlepp und Fermate.

Denn au z Basel bringes mir Junge wyter,
s deent noo jedere Gmainsaame weniger schytter
und bis am Morgestraich deents saumässig guet
und vor allem hänn mirs au unterenand guet!